




www.BibleForChildren.org





Génesis 6



Ama nimechpohuilis tlen panoc
ica Noé. Noé eliyaya se cuali
tlacatl iixtla Toteco Dios. Niyon
se ipan nopa tonali ax huelqui
quiteilhui ica niyon se tlamantli.




Yajaya nejnenui queja Toteco
Dios quinequiyaya. Huan
Toteco Dios quiitac para
nelfiero eltoya, huan nochi
tlacame san mocuapolojttoyaj
ipan tlajtlacoli.




Huajca Toteco Dios quiilhui Noé:
“Niquinpolihuiltis nochi tlacame campa
hueli ipan tlaltepactli pampa nochi san
mosisiníaj, yeca niquinixpolos ica
nochi tlen onca.”



“Huajca xijchihua se cuacanhua ica nopa
cuahuitl tlen itoca resina huan calijtic
xijchihuili pilcuartojtzitzi. Xijzacua ica
chapopojtli campa hueli iijtic huan ipani
para ma ax calaquis atl.”



“Queja ni
xijchihua nopa
cuacanahua.
Xijchihua 135 metros
ihuehueyaca, 22 metros
huan tlajco ipatlajca huan
13 metros huan tlajco
ihuejcapanca.”




“Nojquiya xijhuica mohuaya
nochi tlamantli tlacualistli
tlen monequis inquicuase
imojuanti huan nochi
nopa tlapiyalime.”




“Nojquiya tiquinhuicas mohuaya ome tlapiyalime, se
oquichtli huan se sihuatzi tlen nochi tlamantli
tlapiyalime tlen itztoque ipan tlaltepactli para
ma noja itztoca mohuaya.”




“Xiquinhuica mohuaya chicome oquichme huan
chicome sihuatzitzi tlen nochi tlamantli
tlapiyalime tlen cuali para tlacajcahualistli.
Pero xijhuica san se oquichtli huan se
sihuatzi tlen nopa tlapiyalime tlen ax
motequihuíaj para tlacajcahualistli.”






Huan Noé
calajqui ipan
cuacanahua
ininhuaya iconehua,
isihua huan iyexhua
para momanahuse tlen
nopa miyac atl tlen hualas.



A stylized line drawing of a boat's hull, shown from a perspective view. The hull is composed of several parallel lines that curve downwards towards the bottom right. A rectangular window with horizontal lines is positioned on the side of the hull. The drawing is simple and uses only black outlines on a white background.


Quema Noé
quipayayaya 600
xihuitl, ipan nopa
17 tonali tlen nopa
ompa metztli tlapojqui
nochi ameltini campa
meyayaya nopa atl tlen onca
tlatzintla huan tlahuel pejqui toponi
atl. Huan pejqui huetzi nelía miyac
atl tlen ax moquetzqui.





Huan para 40 tonali huan 40 yohuali
huetziyaya atl ipan tlaltepactli.






Huan nopa atl noja más tlejcoc
huan tlahuel huejcatla mochijqui,
pero nopa cuacanahua
nejnentiyaajqui aixco.




Huan teipa noja más tlejcotiyajqui hasta
quinatzonpolihuilti nopa tepetini tlen más
huejcapantique ipan tlaltepactli. Nochi
tlen itztoyaj ipan tlaltepactli tlen
tlaijiyotilanayayaj mijque.




Huajca Toteco Dios quiilnamijqui Noé
ica nochi nopa tlapiyalime tlen itztoyaj
iijtic cuacanahua. Huan Toteco Dios
quichijqui ma tlaajaca ipan tlali, huan
nopa atl pejqui temo.






Huajca Noé quichixqui
seyoc 40 tonali huan
quitlapo nopa ventana
tlen quichijtoya ipan nopa
cuacanahua. Teipa nojquiya
quimajcajqui se paloma para
quiitasquía intla ya huajqui
nopa tlali.




Huan ipan nopa tonal 27 itequi nopa ompa metztli, ya
tlami huactoya nopa tlali. Huajca Toteco Dios
quiilhui Noé: “Xiquisa tlen nopa
cuacanahua ihuaya mosihua,
moconehua huan
moyexhua.”



Teipa Noé quichijqui se tlaixpamitl para TOTEKO. Huan quicuic tlen sesen tlamantli tlapiyali huan sesen tlamantli tototl tlen cuali para tlacajcahualistli. Huan quinmicti huan quintlati ipan nopa tlaixpamitl para se tlacajcahualistli para TOTEKO.







“Ya ni elis nopa
tlanextilijcayotl tlen
nopa tlajtoli tlen
nijchihua imohuaya
huan ininhuaya nochi
tlapiyalime para nochipa.
Quinextis ayoc quema oncas

tlahuel miyac atl
hasta quinmictis
nochi tlacame huan
tlapiyalime.”



“Nijtlalijtoc
noacosamalo ipan
mixtli huan eltos
queja se
tlanextilijcayotl tlen
nopa tlen nijtencahuilía ni
tlaltepactli.”





“Huan quema
nijchihuas ma huala
mixtli ipan
tlaltepactli,
noacosamalo monextis
ipan nopa mixtli, huan
huajca niquilnamiquis

notlajtol tlen nijcajqui
imohuaya huan
ininhuaya nochi tlamantli
tlapiyalime. Ayoc quema
oncas tlahuel miyac atl
campa hueli hasta
quinpolos nochi tlamantli
tlen itztoque.”




Huan Toteco Dios
quitiochijqui Noé huan iconehua
ica ni tlajtoli: “Xiquinpiyaca
miyac imoconehua huan
xijtemitica ni tlaltepactli.”



Iconehua Noé tlen
ihuaya quisque ipan cuacanhua
elque Sem, Cam huan Jafet.
Huan Cam elqui itata Canaán.

Tlen ni ieyi telpocahua Noé
quisque nochi tlacame tlen
teipa momoyajque
campa hueli
ipan

tlaltepactli para quitemitise.



Toteco nelía miyac quinicnelía nochi
tlacame ipan ni tlaltepactli huan yeca
quititlanqui Icone iyojtzi para miquis
ininpampa. Huan queja nopa nochi
tlen quineltocase, ax polihuisse,
pero quipiyase yolistli tlen
yancuic para
nochipa.



Romanos 3:23

Pampa nochi tlacame tlajtlacolchijtoque. Axaca senquistoc cuali queja Toteco tlen nelía cuajcualtzi hasta quiapiya itlatlanex.

Romanos 6:23

Intla se tlacatl tlajtlacolchihua, quipantía miquistli queja itlaxtlahuil, pero Toteco Dios techmaca se regalo quema tijnelto caj Tohueyiteco Jesucristo, huan nopa regalo eltoc yolistli yancuic para nochipa.

Hebreos 9:27

Pampa Toteco Dios quitlaliytoc para monequi nochi tlacame ma miquica san se huelta huan teipa monextise iixpa para ma quintlajtolsencahuas.



Efesios 2:8,9

Huajca pampa nelía hueyi iyolo Toteco Dios, yajaya inmechmaquixti tlen imotlajtlacolhua quema inquineltocaque Jesucristo. Huan ax inquineltocaque Jesucristo imoseltitzitzi, pero elqui Toteco techmacac nopa tlaneltoquili. Huan ax inmechmaquixti pampa inquichijtoyaj se tlamantli tlen cuali para queja nopa axaca huelis mohueyimatis iixpa.

Romanos 10:9,10

San monequi tiquinilhuis sequinoc para Jesús itztoc mohueyiTeco. Huan monequi tijneltoacas ipan moyolo para Toteco quiyoliti quema ya mictoya. Huan Toteco mitzmaquixtis tlen motlajtlacolhua. Pampa quema ipan toyolo tijneltocej Jesucristo, Toteco techchihua tixitlahuaque iixpa. Huan quema tiquinilhuisse sequinoc para tijneltocej Tohueyiteco Jesucristo, yajaya techmaquixtía tlen totlajtlacolhua.



Juan 3:16,17

Toteco nelía miyac quinicnelía nochi tlacame ipan ni tlaltepactli huan yeca quititlanqui Icone iyojtzi para miquis ininpampa. Huan queja nopa nochi tlen quineltocase, ax polihuisse, pero quipiyase yolistli tlen yancuic para nochipa. Toteco ax quititlanqui Icone ipan ni tlaltepactli para tetlatzacuiltis. Quititlanqui para temaquixtis.

1 Juan 5:11-13

Huan ya ni tlen Toteco techyolmelahua: Toteco techmacatoc yolistli tlen yancuic huan ni yolistli tlen yancuic eltoc ipan Icone Jesucristo. Yajaya tlen quipiya Icone Toteco ipan iyolo quipiya yolistli tlen yancuic, pero tlen ax quipiya Icone, ax quipiya nopa yolistli. Nimechtlajcuilhuilía imojuanti tlen inquinelto caj ipan itequihuejcayo Icone Toteco. Nijnequi xijmatica temachtli ya inquipiyaj yolistli yancuic tlen ax quemá tlamis, huan para más xijneltocaca ipan ya.



Génesis 6 – 10

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: M. Maillot, Tammy S.

Nahuatl, Eastern Huasteca Bible (nhe) © 1985, 2005
Wycliffe Bible Translators, Inc. All rights reserved.

<https://live.bible.is/bible/NHETBL/GEN/1>

©2026 Bible for Children, Inc.

www.M1914.org

www.bibleforchildren.org

